

LXVII

RONDEAU PARFAICT.

A SES AMYS APRES SA DELIVRANCE

En liberté maintenant me pourmaine,
Mais en prison pour tant je fuz cloué :
Voyla comment Fortune me demaine.
4 C'est bien, & mal. Dieu soit de tout loué¹.

Les Envieux ont dit, que de Noé²
N'en sortirois : que la Mort les emmaine.
Maulgré leurs dentz le neud est desnoué³,
8 En liberté maintenant me pourmaine.

Pourtant si j'ay fasché la Court Rommaine,
Entre meschans ne fuz oncq alloué :
Des biens famez j'ay hanté le dommaine⁴ :
12 Mais en prison pourtant je fuz cloué.

Car aussi tost que fuz desavoué
De celle là, qui me fut tant humaine⁵,
Bien tost apres à saint Pris⁶ fuz voué :
16 Voylà comment Fortune me demaine.

J'eus à Paris prison fort inhumaine :
A Chartes fuz doucement encloué⁷ :
Maintenant voys, où mon plaisir me maine.
20 C'est bien, & mal. Dieu soit de tout loué.

Au fort, Amys, c'est à vous bien joué,
Quand vostre main [hors du parc] me ramaine.
[hors de per]
Escript, & fait d'ung cuer bien enjoué,
24 Le premier jour de la verte Sepmaine⁸,
En liberté.